



## ADMINISTRACIÓN LOCAL

### PROVINCIAL

#### DEPUTACIÓN PROVINCIAL DA CORUÑA

##### Servizo de Acción Social, Cultural e Deportes. Sección de Educación, Cultura e Deportes

R.P. 7086/2024.- Aprobación das bases do VIII Premio “Begoña Caamaño” á acción cultural pola igualdade de xénero

#### VIII Premio “Begoña Caamaño” á acción cultural pola igualdade de xénero

En memoria da xornalista, escritora, activista cultural e feminista galega Begoña Caamaño, e coa finalidade de recoñecer as persoas e iniciativas culturais e artísticas que promoven socialmente a igualdade de xénero desde o campo da cultura, a Deputación da Coruña convoca a VIII edición do Premio “Begoña Caamaño” á acción cultural pola igualdade de xénero de acordo coas seguintes

#### BASES

##### Primeira.-

A convocatoria está destinada a recoñecer traxectorias de persoas, colectivos ou entidades e propostas artísticas comprometidas coa promoción da igualdade de xénero desde o pensamento feminista e desde o campo da cultura, quer no ámbito da provincia, quer a nivel galego.

Poderán presentar candidaturas para a concesión do premio todas as persoas físicas ou xurídicas que estiveren interesadas na promoción da igualdade de xénero e o pensamento feminista desde o campo da cultura.

As persoas que formaren parte do xurado poderán propor candidaturas que deberán facer chegar ao resto das persoas integrantes do xurado cando menos 72 horas antes da sesión de deliberación.

Nas candidaturas poderán propoñer calquera persoa, colectivo, asociación ou entidade ligada a proxectos que se desenvolvan ou relacionen coa promoción da igualdade de xénero, e o pensamento feminista desde o campo da cultura, ou que salienten polo desenvolvemento de actividades culturais que impliquen o seu avance social desde o traballo artístico, e que teñan a súa residencia ou sede social no territorio galego.

Só se admitirá unha candidatura por persoa física ou xurídica.

Non se admitirán candidaturas presentadas por persoas ou entidades premiadas nas edicións anteriores do Premio e tampouco se poderán propoñer autocandidaturas.

A convocatoria tramitarase de xeito telemático, a través da plataforma de tramitación electrónica da Deputación (SUBTEL).

Dado que a tramitación será telemática:

Quen presente a candidatura deberá dispoñer dun único enderezo electrónico de contacto durante a tramitación do expediente, ao que se dirixirán as comunicacións; excepcionalmente, e de xeito xustificando, poderá modificar este enderezo inicial, sempre e cando se lle notifique o dito cambio á Deputación.

Deberán dispoñer de certificado dixital.

##### Segunda.-

Establécense dous premios, dotados con 6.500 € cada un deles, para cada unha das seguintes modalidades:

- TRAXECTORIA: dirixido a premiar a traxectoria de persoas, colectivos ou entidades comprometidas coa promoción da igualdade de xénero desde o pensamento feminista e desde o campo da cultura.

- INICIATIVA: dirixido a premiar iniciativas ou proxectos culturais que incorporen unha perspectiva feminista en todas as actividades e servizos derivados.

O premio poderá quedar deserto e tamén ser concedido con carácter ex aequo; neste caso, o seu importe repartirase proporcionalmente entre as persoas e/ou entidades que resultaren premiadas.

Esta cantidade está suxeita ás retencións legais que lle foren aplicábeles.

O premio non poderá concederse a título póstumo, sen prexuízo dos dereitos de sucesión que poidan exercerse si a persoa premiada falecese despois da decisión do xurado (no caso de persoas físicas).

#### Terceira.-

O prazo de presentación de solicitudes iniciárase o día seguinte ao da publicación do extracto da convocatoria deste premio no BOP da Coruña, a través da Base de Datos Nacional de Subvencións e rematará ás **14:00 horas do día 10 de maio de 2024**.

As solicitudes presentaranse de xeito telemático na sede electrónica da Deputación da Coruña, a través da plataforma de tramitación electrónica da Deputación (SUBTEL).

A solicitude e toda a documentación estará asinada pola persoa que presenta a candidatura.

A presentación telemática producirá plenos efectos xurídicos, sempre que a solicitude sexa presentada dentro do prazo establecido e na plataforma citada. Non se terán por presentadas as solicitudes que se acheguen noutros rexistros.

Serán rexeitadas automaticamente as solicitudes que conteñan documentos electrónicos que incorporen código malicioso ou dispositivo susceptible de afectar á integridade ou seguridade do sistema, omitan documentos esixidos, non se cumprimenten os campos requiridos como obrigatorios ou cando conteñan incongruencias ou omisións que impidan o seu tratamento.

#### Cuarta.-

A documentación que se ha presentar é a seguinte:

- Memoria explicativa do proxecto no que se recollan os datos seguintes da persoa ou entidade proposta:

- Nome da persoa, colectivo, asociación ou entidade; NIF
- Nome representante, NIF
- Enderezo postal
- Teléfono
- Enderezo electrónico
- Enderezo web
- Méritos que se alegan para a proposta de candidatura, tendo en conta os criterios explicados na base quinta desta convocatoria.
- Documentación achegada para acreditar os méritos
- Declaración de conformidade da persoa/entidade proposta coa presentación da candidatura.

- Declaración de consentimento expreso para o tratamento dos datos persoais que constan na solicitude para a participación no VIII Premio “Begoña Caamaño” á acción cultural pola igualdade de xénero, de conformidade co establecido na Lei Orgánica 3/2018, de 5 de decembro de Protección de Datos Persoais e garantía dos dereitos dixitais.

No caso de persoas xurídicas:

- Acreditación da delegación da Presidencia ou persoa en quen delegue na que se especifique o alcance da dita delegación (presentación telemática da solicitude e sinatura electrónica de toda a documentación necesaria para a súa tramitación).

#### Quinta.-

O xurado estará presidido pola persoa que ocupe a presidencia da Deputación ou persoa en quen delegue e formarán parte del cinco persoas de recoñecido prestixio no ámbito da cultura galega e o traballo social pola igualdade de xénero, nomeadas pola área de Cultura da Deputación.

As funcións de secretaría exerceraas a secretaria da Corporación, ou a funcionaria ou funcionario en quen delegue.

Para o nomeamento do xurado respectarase a presenza equilibrada de mulleres e homes, en cumprimento do disposto no Capítulo I, artigo 5.2d) do Decreto lexislativo 2/2015, de 12 de febreiro, polo que se aproba o texto refundido das disposicións legais da Comunidade Autónoma de Galicia en materia de igualdade

As persoas que integren o xurado estarán sometidas ao deber de abstención nos casos sinalados no artigo 23 da Lei 40/2015, de 1 de outubro, de rexime xurídico do sector público.

A composición do xurado darase a coñecer, con anterioridade á súa reunión, no taboleiro de anuncios da sede electrónica da Deputación (<https://sede.dacoruna.gal/sxc/gl/informacion/>), co fin de que se poidan interpor, se for o caso, os recursos legais pertinentes.

**Sexta.-**

O xurado actuará en pleno, en sesión a ser posible única, e será necesaria a asistencia da maioría simple dos seus membros. Para os efectos da validez da súa constitución aplicarase o disposto no art. 17 da Lei 40/2015, de 1 de outubro, de Réxime Xurídico do Sector Público.

As deliberacións serán secretas e delas redactarase a acta correspondente.

Para conceder os premios o xurado terá en conta os seguintes criterios:

\* *Perspectiva feminista*. Uso habitual da perspectiva feminista, quer a nivel persoal e/ou profesional, quer nas actividades e servizos derivados da iniciativa ou proxecto cultural.

\* *Traxectoria*. Tarefa continuada desenvolvida ao longo do tempo en favor da promoción da igualdade de xénero desde o ámbito cultural.

\* *Impacto social*. Contribución coas súas actividades, propostas e traxectoria á igualdade de xénero en sectores de especial relevancia económica, social e cultural.

O xurado poderá valorar outros méritos, que dará a coñecer, das persoas, colectivos ou entidades que se propoñan.

O xurado presentará a súa proposta á presidencia da Deputación, que é o órgano competente para conceder o premio.

O fallo do xurado será inapelable; terá lugar no primeiro semestre de 2024 e será dado a coñecer a través do taboleiro de anuncios da sede electrónica da Deputación (<https://sede.dacoruna.gal/sxc/gl/informacion/>); a Deputación resérvase o dereito a cambiar a data se é necesario.

**Sétima.-**

A participación nesta convocatoria supón a total aceptación destas bases.

**Oitava.-**

Os datos persoais obtidos neste procedemento serán tratados, na súa condición de responsable, pola Deputación da Coruña coa finalidade de levar a cabo a tramitación administrativa que derive da xestión deste procedemento. O tratamento dos datos baséase no cumprimento dunha misión de interese público. Con todo, determinados tratamentos poderán fundamentarse no consentimento das persoas interesadas.

Os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou por obriga legal.

As persoas interesadas poderán exercer os dereitos de acceso, rectificación, supresión, oposición, limitación ao tratamento e portabilidade dos datos a través da sede electrónica da Deputación da Coruña ou presencialmente nos lugares e rexistros establecidos na normativa reguladora do procedemento administrativo común.

Para facilitar o exercicio dos dereitos, a Deputación pon ao seu dispor un modelo de solicitude de [https://sede.dacoruna.gal/sxc/gl/procedimientosytramites/tramites/EjercicioDerechosLOPD\\_N](https://sede.dacoruna.gal/sxc/gl/procedimientosytramites/tramites/EjercicioDerechosLOPD_N)

Para calquera outra dúbida poderá dirixirse ao Delegado de Protección de datos da Deputación a través do seguinte correo electrónico: [delegadodeprotecciondedatos@dacoruna.gal](mailto:delegadodeprotecciondedatos@dacoruna.gal)

A Coruña, 23 de febreiro de 2024.

O presidente,

Valentín González Formoso

A secretaria,

Amparo Taboada Gil

2024/1338